




Cu presencia di Prinses Margriet Museo Arqueologico Nacional Aruba a habri oficialmente

Publico grandi a presencia e acto historico aki



ORANJESTAD (AAN): Diadomingo dia 26 di Juli Museo Arqueologico Nacional Aruba a habri su portanan oficial den un ambiente cu hopi energia positivo. Un multitud di hende a bin Schelpstraat 42 pa tambe forma parti di e acto historico aki.

Su Alteza Real Prinses Margriet y Professor Pieter van Vollenhoven conhuntito a haci e acto oficial di apertura, cual tabata algo unico y nunca antes visto na Aruba. Incorpora den e pre-show bou direccion di sr. Takhai Mohamed a trece un potchi pa dilanti pa sr. Francisco Croes, empleado cu mas añanan den servicio di Museo. Sr. Francisco Croes a presenta e potchi pa Profesor Pieter van Vollenhoven cual a saca un remote control for di e potchi y na su turno a presenta esaki na su casa, SAR Prinses Margriet, cu a primi e boton di e remote control. Na e momento ey, manera un solo, e logo nobo di MANA a sali den laira, riba e edificacion historico, iluminando tur esnan presente, simbolicamente mustrandu un comienzo nobo pa e Museo.

E evento nacional a encera un show espectacular cu a ser prepara pa organizacionan di

Aruba. Antiyas y Hulanda. E 'stage' di e actonan oficial y e show tabata forma door di e plein na Schelpstraat na cual strategicamente a pone tribunanan hisa na l'aira, pa asina crea e ambiente di un semi-'arena'. E 'decor' di e stage tabata e edificacion historico di Museo Arqueologico Nacional Aruba y Monumentenbureau.

Algun invitado selecta a haya e privilegio pa ser invita pa un receptie apart cu SAR Prinses Margriet y Profesor Pieter van Vollenhoven, mientras otro invitadonan a disfruta di e exposicion permanente y temporario. E anochi ameno a clausura cu presentacion di e bandanan Datapanic, Youth Extreme y Dj Intifada cu a percura pa un ambiente masha festivo.

Museo Arqueologico Nacional Aruba ta gradici henter pueblo di Aruba pa su participacion y sosten na e proyecto aki, muy en particular na tur persona y organizacion cu a forma parti di e trabaonan di preparacion, cu na un of otro manera a colabora pa e apertura oficial di MANA por a bira un exito!

Riba e potretnan adhunto por aprecia algun momento durante e anochi festivo, cultural y entretenido di e apertura di MANA.